

Stichting Beth-Rafa ta yudando y buscando ayuda pa hoben drogadicto

Ta preparando pa mand'e Hulanda

ORANJESTAD- Hopi reaccion a drenta ayera na mesa di redaccion di Bon Dia Aruba, riba e caso tristo di e hobencito drogadicto, y e grito pa brind'e e yudanza pa ainda scapa su bida.

Ayer a mainta señor Eric Abdul, di Stichting Beth-Rafa, un fundacion religioso, a confirma cu e fundacion tin dos luna caba trahando cu e caso di e hobencito aki, pa asina mand'e Hulanda pa ayanan trata di brind'e e ayudo cu tanto e tin mester.

Fuera di e fundacion aki na Aruba, tin na Hulanda e fundacion principal cu ta wordo dirigi pa sr. Godfried Wanga, kende ayera mes a reacciona riba e publicacion aki, y na mes momento a pidi pa sosten y ayudo di tur hende pa yuda e hoben aki mas pronto posibel.

E carta cu a ser manda pa redaccion di Bon Dia Aruba, ta bisa lo siguiente:

Apreciado Harold Faro, Dios Bendishonabo.

Harold aki cu Godfried Wanga di Stichting Beth-Rafa Hulanda/Aruba.

Harold tur dia mi ta sinta tras di mi computer ta mira con nos

yiunan y nos famianan ta bai perdi na Aruba den e abismo di droga y alcohol, caminda cu no tin e ayudo adecuado pa e personanan aki na Aruba.

E situacion aki ta hopi grandi y peligroso pa nos pais Aruba, caminda mi a bisa varios bes cu Aruba henter tin cu duna un man cohuntamente, pa wak con nos por haya un solucion y tambe con lo nos por salba nos ser kerinan cu ta pasando den situacionnan tristo, caminda nan so no tin e forza pa sali di e problema grandi aki, cu ta cabando cu nos yiunan y famianan.

Gobierno so no por ataca e problema grandi aki, ta Pueblo di Aruba henter tin cu duna un man y cu amor pa salba locual cu nos por salba, ya cu no ta laat ainda.

Ami Godfried Wanga, ta un 'ervaren deskundige' riba e tereno aki, kico mi kier bisa, ta cu ami a usa droga pa casi 10 aña largo y cu awor mi ti ta bai haci 8 aña CLEAN di droga y alcohol. No tabata facil pero Cristo Hesus a saca e man pami y ami na mi turno a tene Su Man y no a lague bai, caminda mi ta clean aworaki pa casi 8 aña.

Mi ta bai haci 8 aña bibando

na Hulanda trahando como boluntario riba e tereno aki pa yuda nos Arubianonan cu kier un cambio den nan bida y pa stop di usa droga y alcohol y pa forma nan famia bek manera mester ta.

Den e 7 añanan mi a trece como 70 persona Hulanda pa ayudo, dus pueblo di Aruba conocemi hopi bon dor cu varios bes mi tabata na television cerca Dika y tambe den show di Robby Schouten den corant y tambe na radio pa testifica y tambe pa splica kico e situacion aki ta ensera y con pa yuda nos ser kerinan.

Pa 7 aña largo ami cu mi casa, cu forza di Cristo Hesus, a trece e personanan aki Hulanda y hiba enan pa rehabilita den diferente 'opvanghuis'nan. Pa yuda nos Arubianonan mihor e aña aki nos a dididi di huur un edificio caminda nan no tin nodi di bai otro caminda pero nan por reabilita cerca nos mes den e opvanghuis.

E yiu di 15 aña cu ta riba frontpage di corant Bon Dia Aruba, mi conoce hopi bon di cerca, dor cu Beth-Rafa Aruba su team ta bezig ya caba 2 luna ta begeleid e cu su mama, pa wak un manera si e por bin

Hulanda caminda Beth-Rafa Hulanda lo tum'e over y yuda e yiu aki c'un futuro briyante cu forza di Cristo Hesus.

Cualquier persona cu kier saca un man pa yuda nos, pa e yiu aki di 15 aña yega Hulanda, por tuma contacto cu Eric Abdul, telefoon 594-6319 of Pastora Rubi franken na telefoon 561-7354.

No laga nos ta lesado so Aruba, pero ban demonstra cu nos kier yuda cu e problema aki na Aruba. Tin solucion, ban uni hunto, si uno salba, e ta salba den Nomber di Cristo Hesus, Amen

Actualmente nos tin tres persona ta juda den nos cas na Utrecht, un hoben di 13 aña kende ta bai haci 1 aña y 4 luna, otro di 19 aña, anto un mas grandi di 32 aña. Mi ta ripiti, den nos cas nos a traha espacio den cas pa ricibi nan, sperando cu nos lo drenta nos edificio pronto, caminda nos por yuda 10 persona mas.

Nos a tuma e edificio caba y tur cos ta cla pa nos habri dia 1 di mei 2008 venidero cu poder di Dios, pero nos falta 50% di e startkapital cu ta 40.000,- euro pa habri dia 1 di mei venidero.

Nos kier pidi Gobierno di

Aruba, Valero, hotelnan, tur comerciante, tambe di Caya Grandi, y tambe Pueblo di Aruba, pa uni cu nos pa yuda esnan cu ta bai perdi cu no por yuda nan mes.

Nos a hinca di nos parti pa 7 aña y nos kier sigi cu e trabou bunita aki, pesey nos ta pidi cu henter nos curazon pa Aruba henter para cu nos. E plannan ta pa tambe den futuro sercan, nos trece e proyecto aki Aruba.

THIS IS JUST THE BEGINNING. Amen

Por deposita riba cuenta di G.C Wanga StichtingBeth-Rafa Hulanda, na abn/amro bank, nr 52 07 62 754, Nieuwegein / Utrecht

Tambe pa deposita na Aruba por yama Eric Abdul na 594-6319 of Pastora Rubi franken di Iglesia Avivamiento na Pos Chiquito 11-B, na telefon 561-7354.

Dios Bendiciona bosnan tur ricamente y nos ta spera di haya un contesta positivo di Aruba henter.

Saludos, Godfried y Lorna Wanga, Stichtingbeth-Rafa. Pa informacion por e-mail of bel, stichtingbeth-rafa@hotmail.com, 0031308894181 of 0031620173836.